



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-1758/03.

Sarajevo, 18. decembra 2003.

Z A P I S N I K

26. sjednice Predstavničkog doma Parlamentarne skupštine Bosne i Hercegovine,
održane 18. decembra 2003. godine

Sjednica je počela u 9,20 sati. Prisustvovalo je 39 poslanika. Odsustvo su opravdali Nijaz Duraković, Azra Hadžiahmetović i Ljiljana Milićević.

Iz Vijeća ministara kratko je prisustvovala Lidiya Topić, zamjenik ministra vanjskih poslova.

Iz međunarodnih organizacija prisustvovali su Maja Ribar - OHR i Aleksandar Vuković - OSCE.

Predsjedavajući Nikola Špirić dao je uvodne napomene u vezi s prijedlogom dnevnog reda, a zatim je upoznao poslanike o tome da je Kolegij imao razgovore s predstavnicima različitih strukovnih organizacija u BiH, koji su ukazali na veoma teško ekonomsko i socijalno stanje, posebno na problem domaće proizvodnje. U ovom kontekstu rekao je da je Kolegij dobio inicijativu Kluba SDP-a za sazivanje posebne sjednice Doma na kojoj bi se razmatralo ovo stanje, kao i da je Momčilo Novaković podnio Prijedlog rezolucije o moratoriju na primjenu sporazuma o slobodnoj trgovini. U vezi s ovim pitanjima vođena je rasprava u oba kolegija, pa je ocijenjeno da bi najbolje bilo da se za 29. decembar sazove tematska sjednica Doma na kojoj bi se razmatralo aktuelno ekonomsko-socijalno stanje u BiH, s posebnim osvrtom na zaštitu domaće proizvodnje, rekao je, između ostalog, Nikola Špirić.

U okviru rasprave povodom prijedloga dnevnog reda učestvovali su: Šefik Džaferović, Momčilo Novaković, Milorad Živković, Tihomir Gligorić, Zlatko Lagumdžija, Seada Palavrić, Martin Raguž, Sead Avdić, Beriz Belkić i Nikola Špirić.

Šefik Džaferović predložio je da Dom usvoji zaključak kojim će se od Predsjedništva BiH zatražiti detaljna informacija o okolnostima pod kojim je došlo do posjete ministra vanjskih poslova BiH Mladena Ivanića Izraelu, i da se o tome u Domu obavi rasprava, u prisustvu Mladena Ivanića.

Momčilo Novaković zatražio je da se u dnevni red uvrsti Prijedlog rezolucije o moratoriju na primjenu sporazuma o slobodnoj trgovini.

Milorad Živković predložio je da se u dnevni red uvrsti rasprava o popisu stanovništva u Bosni i Hercegovini. Obrazlažući prijedlog, između ostalog, rekao je da je on Vijeću ministara, desetak sjednica prije, postavio poslaničko pitanje, na koje nije dobio odgovor, pa je zbog toga, po Poslovniku, obavezno ovo pitanje uvrstiti u dnevni red sjednice.

Tihomir Gligorić predložio je da se kao posljednja tačka u dnevni red uvrsti zahtjev nove komisije formirane u vezi s tzv. slučajem «državni udar» za produženje roka od 30 dana za podnošenje izvještaja, jer objektivno nije u mogućnosti završiti posao u roku koji joj je prilikom formiranja ostavljen.

Zlatko Lagumdžija podsjetio je na zahtjev SDP-a za sazivanje posebne sjednice u vezi s ekonomskom situacijom i sporazumima o slobodnoj trgovini, što tretira i Prijedlog rezolucije Momčila Novakovića. Ako Novaković insistira da se Rezolucija uvrsti u dnevni red, onda on insistira da se poštuje red poteza, jer je Klub SDP-a prvi podnio zahtjev za sazivanje posebne sjednice koji sadrži prijedloge slične onima u Rezoluciji.

U vezi s prijedlogom Šefika Džaferovića da se obavi rasprava o posjeti Mladena Ivanića Izraelu, Zlatko Lagumdžija je rekao da to što je Šefik Džaferović naveo kao razlog zahtijeva ozbiljnu raspravu, ali da postoji još puno povoda za takvu raspravu. Kao druga pitanja o kojima bi Parlament trebalo da raspravlja naveo je informaciju da je BiH donijela odluku da se ovdje stacioniraju baze NATO-a; da je donijela odluku da bosanski vojnici idu u Irak; informacija da je američka administracija napravila spisak od 60 država koje će učestvovati u obnovi Iraka, a da među njima nema Bosne i Hercegovine, te da se da informacija šta se dešava s Programom UN-a «Nafta za hranu», u kojem firme iz čitave BiH imaju svoje programe, itd.

Sead Avdić predložio je da se u dnevni red uvrsti preispitivanje sastava Komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine, iz razloga što nisu adekvatno zastupljeni poslanici iz opozicije.

Predsjedavajući **Nikola Špirić** zamolio je da se povuku zahtjevi za novim tačkama dnevnog reda, a da se na ovoj sjednici raspravlja o već dogovorenim tačkama, tim prije što je na Kolegiju vođena duža rasprava i da je dogovoreno da se 29. decembra održi sjednica s već utvrđenom temom. U vezi s prijedlogom Tihomira Gligorića, rekao je da Dom može radnim zaključkom Komisiji produžiti rok, bez uvrštavanja tačke dnevnog reda.

U ponovnoj diskusiji Zlatko Lagumdžija predložio je da se u dnevni red uvrsti informacija o podršci domaćoj proizvodnji, zaštiti potrošača i efikasnijem punjenju budžeta BiH. Takođe je predložio da Dom usvoji dva radna zaključka:

Prvi, da Vijeće ministara najkasnije za pet dana pripremi i Parlamentu dostavi plan aktivnosti na zaštiti domaće poljoprivredne proizvodnje, potrošača i efikasnijem punjenju budžeta.

Drugi, da se, povodom posljednjih događaja, kao što je posjeta Izraelu, neuvrštavanje bh. firmi u obnovu Iraka, zaduži Predsjedništvo BiH da za narednu sjednicu Parlamenta pripremi informaciju o realizaciji i efektima vanjske politike BiH i odgovornost pojedinaca koji su doveli do nejedinstva i do nepoštivanja dogovorenog u ovoj oblasti.

Ovim je zaključena rasprava u okviru utvrđivanja dnevnog reda, pa je predsjedavajući na glasanje dao prijedloge iz rasprave.

Prvo se Dom izjasnio o prijedlogu Šefika Džaferovića – da se od Predsjedništva BiH zatraži informacija o okolnostima posjete ministra vanjskih poslova BiH Mladena Ivanića Izraelu, koja bi bila predmet rasprave na Domu, u prisustvu Mladena Ivanića.

Od 37 prisutnih, za je glasalo 14, protiv 10, uzdržalo se 12. Po entitetima, iz Federacije za je glasalo 13, iz Republike Srpske 2 poslanika.

Predsjedavajući je konstatirao da prijedlog nije dobio entitetsku podršku, te da će se kasnije provesti postupak usaglašavanja.

Dom je usvojio zaključak da se novoj komisiji za tzv. slučaj «državni udar» produži rok za 30 dana za podnošenje izvještaja.

Za ovaj zaključak glasalo je 29, protiv 5, uzdržala se 3 poslanika.

Dalje je predsjedavajući na glasanje dao prijedlog Momčila Novakovića da se u dnevni red uvrsti Prijedlog rezolucije o moratoriju na primjenu sporazuma o slobodnoj trgovini. Međutim, intervenirao je Momčilo Novaković i rekao da se, prema članu 121. Poslovnika, o uvrštavanju Rezolucije ne glasa, nego da se ona uvrštava u dnevni red.

U vezi s tumačenjem člana 121. Poslovnika govorili su Nikola Špirić, Vinko Zorić, Šefik Džaferović, sekretar Doma Branka Todorović, Zoran Spasojević, Momčilo Novaković, Seada Palavrić, Sead Avdić, Milorad Živković, Zlatko Lagumdžija i Beriz Belkić.

Nakon rasprave, predsjedavajući je dao kratku pauzu da bi se Kolegij konsultirao, a nakon toga je iznio stav Kolegija da se glasa o prijedlogu da se Prijedlog rezolucije prethodno uputi na razmatranje nadležnoj komisiji, a ako taj prijedlog ne prođe, Prijedlog rezolucije bit će uvršten u dnevni red ove sjednice.

Sa 23 glasa za, 9 protiv i 4 uzdržana (iz Federacije BiH za je glasalo 17, iz RS 5) usvojen je zaključak da se Prijedlog rezolucije Momčila Novakovića uputi na razmatranje nadležnoj komisiji.

Zatim se Dom izjasnio o prijedlogu Milorada Živkovića da se u dnevni red uvrsti rasprava o popisu stanovništva u Bosni i Hercegovini. Od 36 prisutnih, za ovaj prijedlog glasalo je 12, protiv 20, uzdržala se 4 poslanika. Prema tome, prijedlog nije usvojen.

Dalje se dom izjasnio o prijedlogu Seada Avdića da se u dnevni red uvrsti preispitivanje sastava Komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine. Ovaj prijedlog usvojen je sa 22 glasa za, 13 protiv i jednim uzdržanim – iz Federacije BiH za 15, iz RS 8.

Predsjedavajući je dalje na glasanje dao prijedloge Zlatka Lagumdžije.

Prijedlog da se u dnevni red uvrsti informacija o podršci domaćoj proizvodnji, zaštiti potrošača i efikasnijem punjenju budžeta nije usvojen. Za prijedlog je glasalo 13, protiv 17, uzdržalo se 6 poslanika.

Takođe nije usvojen prijedlog prvog zaključka koji je iznio Zlatko Lagumdžija. Za ovaj prijedlog glasalo je 15, protiv 17, uzdržalo se 5 poslanika.

Dom je, sa 23 glasa za, 11 protiv i 4 uzdržana (iz Federacije BiH za 16, iz RS 5), usvojio drugi prijedlog zaključka Zlatka Lagumdžije, a koji glasi:

Povodom posljednjih događaja, kao što je put ministra vanjskih poslova u Izrael i neuvrštavanje Bosne i Hercegovine u obnovu Iraka, zadužuje se Predsjedništvo Bosne i Hercegovine da za narednu sjednicu Parlamenta pripremi informaciju o realizaciji i efektima vanjske politike BiH i odgovornosti pojedinaca koji su doveli do nejedinstva i nepoštivanja dogovorenog u ovoj oblasti.

Ovim je izvršeno glasanje o svim prijedlozima iz rasprave u okviru utvrđivanja dnevnog reda.

Predsjedavajući Doma Nikola Špirić konstatirao je da je za 26. sjednicu usvojen sljedeći

D N E V N I R E D

1. Imenovanje tri člana u Zajedničku komisiju oba doma radi postizanja sporazuma o istovjetnom tekstu Zakona o sistemu indirektnog oporezivanja,
2. Zapisnici 23., 24. i 25. sjednice Predstavničkog doma,
3. Poslanička pitanja i odgovori,
4. Izvještaj Komisije Kolegija o nastojanju za postizanje saglasnosti o zahtjevu Vijeća ministara za razmatranje Prijedloga zakona o izmjenama i dopunama Zakona o centralnoj evidenciji i razmjeni podataka po hitnom postupku, u skladu s članom 105. Poslovnika,
5. Zahtjev poslanika Nikole Špirića za razmatranje Prijedloga zakona o izmjeni Zakona o kretanju i boravku stranaca i azilu po hitnom postupku, u skladu s članom 105. Poslovnika,
6. Zahtjev Vijeća ministara za razmatranje Prijedloga zakona o privremenom odgađanju od izvršenja potraživanja po osnovu izvršnih odluka na teret Budžeta institucija Bosne i Hercegovine i međunarodnih obaveza BiH po hitnom postupku, u skladu s članom 105. Poslovnika,
7. Zahtjev Vijeća ministara za razmatranje Prijedloga zakona o proizvodnji naoružanja i vojne opreme po hitnom postupku, u skladu s članom 104. Poslovnika,
8. Zahtjev Vijeća ministara za razmatranje Prijedloga zakona o izmjenama i dopunama Zakona o upotrebi i zaštiti naziva Bosne i Hercegovine po hitnom postupku, u skladu s članom 104. Poslovnika,
9. Zahtjev Vijeća ministara za razmatranje Prijedloga zakona o izmjenama i dopunama Zakona o upravnom postupku po hitnom postupku, u skladu s članom 104. Poslovnika,
10. Zahtjev Vijeća ministara za razmatranje Prijedloga zakona o izmjenama i dopunama Zakona o službenom glasilniku Bosne i Hercegovine po hitnom postupku, u skladu s članom 104. Poslovnika,
11. Izvještaj Zajedničke komisije o nastojanju za postizanje sporazuma o istovjetnom tekstu Zakona o zrakoplovstvu Bosne i Hercegovine,
12. Imenovanje tri člana u Zajedničku komisiju oba doma radi postizanja sporazuma o istovjetnom tekstu:
 - a) Zakona o slobodi vjere i pravnom položaju crkava i vjerskih zajednica u BiH,
 - b) Zakona o Agenciji za osiguranje u BiH,
 - c) Zakona o izmjenama i dopunama Izbornog zakona BiH – predlagач Izborna komisija BiH.
13. Prijedlog odluke o utvrđivanju prestanka poslaničkog mandata Hasanu Muratoviću, zbog podnošenja ostavke,
14. Preispitivanje sastava Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine.

Ad – 1: Imenovanje tri člana u Zajedničku komisiju oba doma radi postizanja sporazuma o istovjetnom tekstu Zakona o sistemu indirektnog oporezivanja

Predsjedavajući Doma, u ime Kolegija, predložio je da se u Zajedničku komisiju imenuju Hazim Felić, Tihomir Gligorić i Filip Andrić.

Momčilo Novaković u kraćoj raspravi rekao je da nema ništa protiv prijedloga Kolegija, ali da upozorava da su u Komisiju predloženi poslanici koji su na Domu glasali protiv Prijedloga zakona.

Kako nije bilo drugih prijedloga, Dom je, sa 31 glasom za i 6 uzdržanih, za članove Zajedničke komisije imenovao Hazima Felića, Tihomira Gligorića i Filipa Andrića.

Ad – 2: Zapisnici 23., 24. i 25. sjednice Predstavničkog doma

U raspravi povodom zapisnika učestvovao je Muhamed Moranjkić. On je rekao da ima dvije primjedbe. Jedna je, kako je rekao, uopćena, a to je da je njegovo mišljenje da nije dobro da se sustižu zapisnici i da na jednoj sjednici imamo 2-3 pa i više zapisnika, s obzirom da vrijeme odmiče i ne može se aktivno pratiti šta se zbivalo. Druga primjedba Muhameda Moranjića bila je na Zapisnik 24. sjednice. Pored ostalog, rekao je da Zapisnik nije adekvatno prenio stanje na sjednici i da nije dobro da se citiraju neki poslanici, a neki ne, te da on stiče utisak da se različitim aršinima vode zapisnici.

Predsjedavajući Doma Nikola Špirić odgovorio je da je u ovom mjesecu Dom imao četiri zasjedanja i da ima razumijevanja za Službu, jer se objektivno ne mogu sačiniti zapisnici s obzirom da je potrebno uraditi i stenograme i zapisnike na osnovu stenograma. Zamolio je ako neko ima konkretnih primjedbi, da nešto nije tačno i da nije u skladu sa stenogramom, da to iznese, a ako nema, da se usvoje zapisnici.

Druge rasprave o zapisnicima nije bilo, pa ih je predsjedavajući dao na glasanje. Zapisnici 23., 24. i 25. sjednice usvojeni su jednoglasno.

Ad – 3: Poslanička pitanja i odgovori

Predsjedavajući je podsjetio da su odgovore na poslanička pitanja do ove sjednice dobili Seada Palavrić, Azra Hadžiahmetović, Mirsad Ćeman i Ruža Sopšta, te da je federalno tužilaštvo zatražilo pojašnjenje pitanja koje je na 17. sjednici postavio Muhamed Moranjkić.

U vezi s dopisom federalnog tužilaštva, Muhamed Moranjkić izrazio je nezadovoljstvo, rekavši, između ostalog, da je to «stvarno lakrdija, ironija i bijeda od odgovora, a to više zabrinjava što to ovako odgovara jedan tako visoki organ kakvo je Tužilaštvo Federacije BiH».

Nova poslanička pitanja postavili su poslanici, kako slijedi:

Petar Kunić:

"Da li je održan sastanak predstavnika Bosne i Hercegovine i Hrvatske o pitanju realizacije ugovora koji se odnosi na zdravstvenu zaštitu, penzijsko i invalidsko osiguranje i dr., i koji su rezultati?"

Muhamed Moranjkić:

«Pitam Vijeće ministara i posebno Ministarstvo za saobraćaj i komunikacije:

a) Imaju li podatke u kakvom se danas stanju nalaze naše željeznice u BiH i da li u ovom stanju, okruženju i mogućnostima mogu da funkcioniraju?

b) Koje su kočnice i ko koči njihovo funkcioniranje, jer se osjećaju lobiji koji to rade?

c) Šta treba neko u ovoj državi uraditi pa da one profunkcioniraju?

Ja imam nezvanične podatke da, uz objektivne razloge, veći dio čine subjektivni i politički razlozi – što je, po meni, neprihvatljivo, a želio bih da imam o tome i zvanične podatke od zvaničnog organa».

Momčilo Novaković:

«1. Ko su članovi Komisije za zaštitu nacionalnih spomenika? Kako ona donosi odluke, na osnovu kojih zahtjeva i prijedloga? Koji su objekti do sada proglašeni nacionalnim spomenicima i na čiji zahtjev ili prijedlog? Koliko još ima neriješenih zahtjeva ili prijedloga, koji su i od koga podneseni?

2. Kada će biti imenovan direktor Ureda za zakonodavstvo?»

Vinko Zorić:

«1. Ako se ide sa izmjenama Ustava BiH, mogu li se dati garancije da će tim izmjenama sva tri naroda biti stvarno ravnopravna i suverena u Bosni i Hercegovini? Dakle, hoće li biti Vijeće ministara i tri vlade sa 16 ministara, odnosno tri puta po 8+5+3. Do sada imamo, osim Vijeća ministara, dvije vlade sa 8+5+3 i one ne garantiraju ni ravnopravnost ni suverenitet hrvatskog naroda, i sve zajedno i nije djeljivo sa 3.»

«2. Šta će Vijeće ministara BiH učiniti kako bi pozitivno odgovorilo na zahtjeve Boćarskog saveza Bosne i Hercegovine?

Boćarski savez BiH obratio se više puta zahtjevom Vijeću ministara BiH za novčanu pomoć, kako za organizaciju Evropskog prvenstva koje je održano u BiH, tako i za odlazak na Svjetsko prvenstvo u oktobru 2003. u Nici u Francuskoj, gdje su postignuti i značajni rezultati (Napominjem da su do sada slične akcije pomagane –vidi akt broj 05-0-1121/02. – Adminsitrativna služba Vijeća ministara).»

«3. Da li je nalog, koji je potpisao Vedran Hadžović, a vodi se pod brojem 03-02-1372-1/03. od 8.12.2003. godine, u skladu s Odlukom Visokog predstavnika broj 155/03. od 22. septembra 2003. godine? Naime, sredstva koja Klub poslanika dobije od PSBiH nisu stranačka i nisu personalna. Pored toga, u Predstavničkom domu PSBiH ne postoji Klub HDZ nego Klub HDZ-Demokrišćani, i svi članovi tog kluba su izabrani na izbornoj listi Koalicije HDZ-Demokrišćani.»

Jelina Đurković:

«1. Kada će Vijeće ministara, saglasno članu 8., a u vezi s članom 6. Zakona o Vijeću ministara Bosne i Hercegovine, izvršiti imenovnje sekretara ministarstava i ostalih rukovodnih radnika koji se imenuju po istim principima (pomoćnik minsitra, direktor, zamjenik direktora i sl)?

2. Da li sastav državnih službenika i ostalih zaposlenih u organima uprave na nivou Bosne i Hercegovine odražava nacionalnu strukturu stanovništva prema posljednjem popisu stanovništva, saglasno članu V.4.b. i IX.3. Ustava Bosne i Hercegovine, i ako ne odražava – zašto?»

Seada Palavrić:

«Podnosim inicijativu da nadležno tužilaštvo u BiH ispita da li postoje elementi krivičnog djela «nesavjesnog rada u službi» ili nekog drugog krivičnog djela kadrova koji su u januaru 2002. godine proizveli slučaj «Alžirska grupa». Ovo iz razloga što je Dom za ljudska prava BiH utvrdio da su postupcima tadašnjih vlasti grubo prekršena osnovna ljudska prava. Pored toga, tim postupcima pričinjena je šteta Budžetu Bosne i Hercegovine u iznosu do 32.500 KM s kamatom, a čini mi se i Budžetu Federacije BiH. Štaviše, šteta u slučaju «Alžirske grupe» svakim danom raste.»

Ruža Sopta:

«Šta je Vijeće ministara uradilo, u skladu s preporukama Međunarodne krizne grupe od 2.6.2003., u rješavanju «problema Brčko Distrikta», da li je osnovano tijelo za koordinaciju aktivnosti s Distriktom i šta je ono učinilo? Naročito o pitanju zaustavljanja sistemskog kršenja ljudskih prava na području Distrikta».

Ivo Miro Jović:

«1. Selektivno, tendenciozno prozivanje u svojim programima o neplaćanju pretplate (pa i mene lično) kada će objaviti izvinjenje svima onima koje nekoliko godina straše, šaljući račune, kaznama i sudom a oni ne posjeduju TV, kao što je slučaj i s mrtvačnicom u Čapljini.»

«2. Šta se preduzima za zaustavljanje gradnje poslovnih objekata u nekropoli srednjovjekovnih stećaka u naselju Željuša s desne strane ceste M-17 na pravcu Sarajevo-Mostar (Ovo hitno, pošto je groblje prethodno napunjeno otpadom a sada se u središtu njegovom gradi objekat).

Milorad Živković:

«Ko je zadužen za izdavanje stalnih licenci za rad u policiji, Državnoj graničnoj službi itd. u BiH nakon 2000. godine i odlaska IPTF-a?»

Ad – 4: Izvještaj Komisije Kolegija o nastojanju za postizanje saglasnosti o Zahtjevu Vijeća ministara za razmatranje Prijedloga zakona o izmjenama i dopunama Zakona o centralnoj evidenciji i razmjeni podataka po hitnom postupku, u skladu s članom 105. Poslovnika

Predsjedavajući je podsjetio da nije postignuta saglasnost u Komisiji Kolegija o Zahtjevu Vijeća ministara da se, po članu 105. Poslovnika, razmatra Prijedlog zakona o izmjenama i dopunama Zakona o centralnoj evidenciji i razmjeni podataka. Zatim je zahtjev Vijeća ministara dao na glasanje.

Od 30 prisutnih, za su glasala 22, protiv 6, uzdržao se jedan poslanik. Glasajući po entitetima, iz RS protiv je glasalo 7 poslanika, a iz Federacije BiH nije bilo glasova protiv. Kako iz entiteta nije bilo 2/3 protiv, predsjedavajući je konstatirao da je Zahtjev Vijeća ministara usvojen, pa je na glasanje dao Prijedlog zakona.

Prilikom glasanja o Prijedlogu zakona bio je prisutan 31 poslanik. Za su glasala 23, protiv 7. Po entitetima, iz Federacije BiH za su glasala 22, iz RS 1 poslanik. Predsjedavajući je konstatirao da Prijedlog zakona nije dobio entitetsku većinu i da će se provesti postupak usaglašavanja.

Ad – 5: Zahtjev poslanika Nikole Špirića za razmatranje Prijedloga zakona o izmjeni Zakona o kretanju i boravku stranaca i azilu po hitnom postupku, u skladu s članom 105. Poslovnika

Dom je usvojio Zahtjev Nikole Špirića da se Prijedlog zakona o izmjeni Zakona o kretanju i boravku stranaca i azilu razmatra po članu 105. Poslovnika. Za zahtjev su glasala 22, protiv 7 poslanika. Po entitetima, iz FBiH za je glasao 14, iz RS 8.

Zatim je usvojen i Zakon o izmjeni Zakona o kretanju i boravku stranaca i azilu. Za Zakon su glasala 22, protiv 7, uzdržao se jedan poslanik. Po entitetima, iz FBiH za je glasalo 14, iz RS 8.

Ad – 6: Zahtjev Vijeća ministara za razmatranje Prijedloga zakona o privremenom odgađanju od izvršenja potraživanja po osnovu izvršnih odluka na teret Budžeta institucija Bosne i Hercegovine i međunarodnih obaveza BiH po hitnom postupku, u skladu s članom 105. Poslovnika

U okviru ove tačke diskutirali su: Nikola Špirić, Seada Palavrić, Mirsad Ćeman, Mladen Potočnik i Momčilo Novaković.

Nakon rasprave Dom je, sa 21 glasom za, 11 protiv i 1 uzdržanim (iz FBiH za 17, iz RS 5), usvojio Zahtjev Vijeća ministara za hitni postupak.

Zatim je Dom usvojio i Zakon o privremenom odgađanju od izvršenja potraživanja po osnovu izvršnih odluka na teret Budžeta institucija Bosne i Hercegovine i međunarodnih obaveza BiH. Za Zakon glasala su 22, protiv 10, uzdržao se 1 poslanik. Po entitetima, iz FBiH za je glasalo 17, iz RS 5.

Ad – 7. do 10.

Bez rasprave Dom je usvojio zahtjeve Vijeća ministara da se po članu 104. Poslovnika Predstavničkog doma razmatraju:

- Prijedlog zakona o proizvodnji naoružanja i vojne opreme,
- Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine,
- Prijedlog zakona o izmjenama i dopunama Zakona o upravnom postupku i
- Prijedlog zakona o izmjenama i dopunama Zakona o službenom glasiliku Bosne i Hercegovine.

Ad – 11: Izvještaj Zajedničke komisije o nastojanju za postizanje sporazuma o istovjetnom tekstu Zakona o zrakoplovstvu Bosne i Hercegovine

Dom je jednoglasno usvojio Izvještaj Zajedničke komisije o usaglašavanju Zakona o zrakoplovstvu Bosne i Hercegovine, sa zaključkom da Dom odobrava normativno-tehničko uređenje Zakona, saglasno usvojenim amandmanima.

Ad – 12: Imenovanje tri člana u Zajedničku komisiju oba doma radi postizanja sporazuma o istovjetnom tekstu:

- a) Zakona o slobodi vjere i pravnom položaju crkava i vjerskih zajednica u BiH,

- b) Zakona o Agenciji za osiguranje u BiH,
- c) Zakona o izmjenama i dopunama Izbornog zakona BiH – predlagač Izborna komisija BiH

U zajedničke komisije oba doma radi postizanja sporazuma o istovjetnom tekstu zakona imenovani su:

- a) Momčilo Novaković, Martin Raguž i Mirsad Ćeman – za Zakon o slobodi vjere i pravnom položaju crkava i vjerskih zajednica u BiH,
- b) Elmir Jahić, Nikola Kragulj i Ruža Sopta za Zakon o Agenciji za osiguranje u BiH i
- c) Vinko Zorić, Šefik Džaferović i Petar Kunić za Zakon o izmjenama i dopunama Izbornog zakona Bosne i Hercegovine.

Ad – 13: Prijedlog odluke o utvrđivanju prestanka poslaničkog mandata Hasanu Muratoviću, zbog podnošenja ostavke

U raspravi povodom ostavke Hasana Muratovića na dužnost poslanika, kao i na ostale dužnosti na koje je kao poslanik biran, učestvovali su: Mladen Potočnik, Martin Raguž, Šefik Džaferović, Sead Avdić, Nikola Špirić i Beriz Belkić. U raspravi je, između ostalog, izraženo žaljenje što je Hasan Muratović odlučio da podnese ostavku na poslaničku dužnost i odati priznanje gosp. Muratoviću za veoma uspješan i korektan rad, posebno u delegaciji Parlamentarne skupštine u Vijeću Evrope. Zato je gosp. Muratović zamoljen da prihvati da mu mandat traje do 1. februara, a ne do 1. januara kako je naveo u ostavci, kako bi mogao predvoditi našu delegaciju na redovnom zasjedanju Parlamenta Vijeća Evrope u Strazburu, koje se održava krajem januara 2004. godine.

Hasan Muratović zahvalio je kolegama na pozitivnom mišljenju, kao i na ukazanom povjerenju da ostane poslanik do završetka spomenute sjednice PSVE. Rekao je da je to dobro rješenje, jer se, objektivno, ne bi mogla pripremiti delegacija u novom sastavu, pa je prihvatio da ostane aktivan do završetka sjednice Parlamentarne skupštine Vijeća Evrope, tj. da mu mandat prestane 1. februara 2004. godine. Dalje je, između ostalog, rekao da je on ostavku podnio s čvrstom namjerom i s vrlo jakim razlozima da ne bude više član Parlamenta, te da su razlozi upravo oni koje je u ostavci naveo.

Dom je jednoglasno donio odluku da mandat poslanika Hasana Muratovića prestaje 1. februara 2004. zbog podnošenja ostavke na tu dužnost.

Ad – 14: Preispitivanje sastava Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine

Kao predlagač tačke dnevnog reda Sead Avdić rekao je, između ostalog, da u sastavu Zajedničke komisije ima samo jedan član iz opozicije i da nije zastupljena struktura parlamentarnih stranaka ni u Domu naroda niti u Predstavničkom domu. Naglasio je da bi bilo uputno da SDA – koja ima 4 člana Komisije iz Doma naroda i Predstavničkog doma, kao i SDS – koja ima 3 člana, ustupe po jedno mjesto drugim parlamentarnim strankama.

U raspravi povodom ove tačke učestvovali su: Seada Palavrić, Petar Kunić, Nikola Špirić, Martin Raguž, Šefik Džaferović i Vinko Zorić.

U raspravi nije izražena spremnost klubova koji imaju više poslanika u članstvu Zajedničke komisije da ustupe mjesto nekome iz opozicionih stranaka.

Na prijedlog Martina Raguža, Dom je u Zajedničku komisiju izabrao Vinka Zorića umjesto Martina Raguža.

Ovim je realiziran dnevni red 26. sjednice.

Sastavni dio Zapisnika je transkript 26. sjednice Predstavničkog doma.

Sjednica je završena u 16,30 sati.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Nikola Špirić